



Komunikadu Imprensa

Rejiaun Administrativa Espesiál Oekusi Ambeno (RAEOA)

05 Marsu 2024

JSMP kontinua nia Atividade PASK iha Suku Lifau Xefe Suku no Jestór Administrativu : Prezensa JSMP nian iha Suku Lifau konsege redus problema comunidade nian

Iha 27 Feveireiru 2024, JSMP ho autóridade Suku Lifau, Sub-Rejiaun Pante-Makasar, RAEOA kontinua estende Programa Apoui Seguransa Komunitáriu (PASK) liuhosi asina Nota Entendimentu (MoU) ba períodu fulan neen iha tinan 2024.

“Agradese ba estrutura, comunidade Suku Lifau, PNTL no Jestór Administrativu Pante Makasar, ba konfiansa nune’e ohin ita estende tan serbisu hamutuk liuhosi Programa Apoui Seguransa Komunitáriu atu fasilita comunidade sira asesu ba justisa komunitáriu no Nasionál. Iha tinan kotuk, ita konsege atinje objetivu balun tanba ne’e agradese tebes ba kolaborasaun no serbisu hamutuk estrutura, autoridade seguransa no comunidade tomak maibé karik atividade balun seidak atinje, husu nafatin kolaborasaun iha tinan ida ne’e nune’e ita bele atinje objetivu sira liuliu lori ema hotu asesu ba justisa,” dehan Sra. Ana Paula Marçal, Diretora Ezekutiva JSMP.

Iha intervensaun, Jestór Administrativu Pante Makasar, Sr. Eurico da Costa Bobo, agradese tebes ba serbisu hamutuk ne’e no husu atu kontinua programa ne’e ba oin no bele haluan tan ba suku seluk tanba rezultadu hosi programa ne’e iha tinan kotuk iha Suku Lifau hatudu progresu boot, katak antes ne’e comunidade Suku Lifau iha kazu barak ne’ebé rejistu maibé ho prezensa JSMP nian iha suku ne’e iha tinan kotuk, ajuda tebes comunidade sira kompriende no iha konsensia hodi redus problema iha comunidade.

Jestór ne’e mós husu atu JSMP koninua serbisu hamutuk ho Suku Lifau no husu atu haluan programa ne’e ba iha suku sira seluk iha Pante-makasar.

Iha parte seluk, Komandante Polísia Eskuadra Pante Makasar, Sr. Jaimito Hei agradese ba JSMP ne’ebé kontinua estende nia programa ne’e iha Suku Lifau, no nia parte prantu atu koopera no serbisu hamutuk ho JSMP hodi ajuda comunidade sira asesu ba justisa Nasionál no husu mós ba JSMP atu haluan nia programa ne’e ba comunidade sira iha suku seluk tanba mezmua ema dehan comunidade Oekusi ne’e moris hakmatek maibé realidade comunidade Oekusi barak mós iha prizaun Bekora.

Iha sorin seluk, Xefe Suku Lifau, Sr. Delfino Sole iha nia intervensaun haktuir katak antes JSMP ho Suku Lifau serbisu hamutuk iha tinan kotuk no Suku Lifau iha problema barak ne’ebé akontese maibé depoisde JSMP estabelese serbisu hamutuk ho Suku Lifau ba programa PASK, comunidade sira iha Suku Lifau hahú kompriende no iha ona konsiensia hodi hamenus problema iha suku

laran. Xefe suku mós haktuir katak programa ida ne'e ajuda tebes autoridade suku oinsa rezolve problema komundade nian iha suku laran, aldeia no uma lisan sira.

Programa ne'e ho nia objetivu atu tulun komundade lokál sira no intervenente sira iha sistema justisa nasional hodi hadi'ak ligasaun entre sistema sira no mós hadi'ak justisa ida ne'ebé justu hodi fasilita komundade hotu-hotu bele asesu justisa nasional ho atividade sira hanesan:

1. Observa prosesu rezolusaun disputa komunitáriu no hala'o peskiza lokál
2. Fornese informasaun hodi tulun halo revizaun ba iha Regra Tara-bandu
3. Fahe informasaun kona-ba progresu kazu sira hosi polisia, tribunál, prokuradória ba iha suku sira tarjetu
4. Advokasia atu hadi'ak liután ligasaun komundade sira ho justisa formál
5. Fahe informasaun kona-ba asesu ba sistema justisa formál
6. Sei introdús *Case Log* ba Konsellu suku sira no OPS kona-ba oinsa atu priense formuláriu kazu sira.

MoU ne'e asina hosi Diretora Ezekutiva JSMP, Sra. Ana Paula Marçal no Xefe Suku Lifau, Sr. Delfino Sole no akompaña hosi Jestór Administrativu Pante-Makasar, Sr. Eurico da Costa Bobo, Komandante Polisia Eskuadra Pante-Makasar Sr Jaimito Hei. Seremónia asina MoU ne'e partisipa hosi xefe aldeia sira, delegadu/a, reprezentente juvendale feto-mane, lia-nain no estudante estajiáriu UNPAZ.

Atividade ne'e realiza hosi JSMP liuhosi PASK tanba serbisu hamutuk ho The Asia Foundation (TAF) ne'ebé finansia hosi Embaixada Nova Zelândia iha Timor-Leste.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl